

## I Gat Tumas Politik!

**[Wan woman mo wan yungfala gel oli stap wokbaot I kam wetem ol kakae mo wan buket wota.]**

Mary: Enid!  
 Enid: Wanem Mummy?!

Mary: Lukaot long wota ya!  
 Enid: Buket I hevi tumas...

Mary: No gat narafala wei nao! Suplae inomo wok! Ol man oli no stap lukoatem suplae ya nating!  
 Enid: Fromwanem nao inomo wok Mummy?

Mary: Ol man oli no lukoatem gud suplae ya nating! Oli no kae! Sapos wota ino gat be wok blong yumi ol woman blong karem wota! Ol man oli no wari!  
 Enid: Mummy.. sapos we kava ifinis bae ol man oli save komplain from.. be wota no!  
**[Sam boe oli ron I kam pass long gel ya. Oli singaot mo laf mo gel I stap folem ol boe wetem eye blong hem.]**

Ron: Traem wokbaot harriup littelbit Enid!  
 Tom: Kivim ol kakae ya long mi! Bae mi lukoatem blong yu!  
 Enid: Tom! Ko lus!  
 Mary: Yu no toktok long ol boe ya Enid!  
 Enid: Wanemi rong?  
 Mary: Yufala ol gel! Yu yungfala nomo be yu stap afterem ol boe!  
 Enid: Mi no stap mekem fasin ya tu!  
 Mary: Sapos Daddy blong yu hemi luk yu mekem kaen ya.. bae hemi wipim no gud yu ya!  
 Enid: Mi no mekem wan samting tu!  
 Mary: Ol yungfala gel roan long ples ya.. oli go ahed blong pleple wetem ol boe! Oli pleple go go oli gat bel! Yu wandem samting ya Enid?  
 Enid: No mummy!  
 Mary: Ol pikinini blong rod ya, bae oli no gat graon tu!  
 Enid: Mi save!  
 Mary: Bae oli kakae wanem taem we oli kam bikwan? Ah?  
 Enid: Kas! **[Mary hemi wokbaot igo aot.]** Hemi stap tok long mi oltaem! Mi lez!  
**[Hemi go aot nao. Wan man hemi kam insaed mo hemi sidaon. Hemi stap mekem wan smol wok. Mary mo Enid oli kam insaed bakegen. Enid hemi sakem ol samting I go daon. ]**

Mary: Karem ol kakae igo long kitchen Enid! **[Enid hemi go kasem narasaed aktign aria nao ya. Hemi puttum kakae I go daon afta hemi luk luk roan mo hemi go aot.]** Isaac! **[Hemi singaotem man blong hem.]**

Isaac: Yu kam bak finis Mary?  
 Mary: Be yes! Yu bin go luk jif Isaac?  
 Isaac: From?  
 Mary: Yu no tinkbaot!? Wota suplae inomo wok nating! Bae yumi evriwan I stap sava! Bae yumi I mas miting from!  
 Isaac: Mi no luk jif iet ...

Mary: Isaac! Bae yu wet kasem wotaem? Yumi stap trubol bikwan from wota! Mifala ol woman mifala I gat fulup tumas wok blong mekem! Be bae mifala I mas karem wota bakegen!

Isaac: Okay.. okay....

Mary: Mi lez mo mi tied tumas..!

Isaac: Mi tu mi stap lez long fasin blong yu! Yu stap toktok oltaem nomo!

Mary: Mi mi stap toktok tumas? Ol fasin we yu yu stap mekem oli save mekem eni kaen woman i toktok!

Isaac: Mary! Yu no mekem mi mi kross! [**Mary hemi wandem toktok mo, be hemi stap kwiet nao ya.**]

Mary: Bae mi go mekem kakae blong aftanun I redi nao. Yu bae yu mekem wanem? Dring kava?

Isaac: Jif bae hemi stap longwe.. sapos mi go nao ya, bae mi finem hem.

Mary: Ale go! [**Isaac hemi gerrup mo hemi go kasem basket kakae ya.**] Enid! Enid! Man.. gel ya I go wea? Hemi bin stap long ples ya nao ya nomo! Enid! Enid! [**Hemi wokbaot I go aot. Enid hemi kam insaed bakegen wetem boe ya Tom.**]

Enid: Mi mas go bak Tom!

Tom: Yu wandem go bak from?

Enid: Bae Mummy mo Daddy I mas brek brekem ol bun blong mi, sapos we oli save se mi stap long ples ya wetem yu!

Tom: Yu no go iet..

Enid: Tom.. plis.

Tom: Sidoan smol.. [**Hemi sidoan, be Enid I stanup iet.**]

Enid: Mi mas kiv han wetem kakae nao Tom! Mi mas go bak!

Tom: Talem long hem se bel blong yu istap tonton.. Yu stap fas long smol hoas!

Enid: [**Hemi kam sidaon.**] Yufala ol boe yu laki!

Tom: Mi? Mi no laki nating! Mi skul gud littelbit, be nao ya mi no gat wok.. no gat samting blong mekem. Mi stap lez nao!

Enid: Yu gat graon! Go wokem graon blong yu!

Tom: Kas! Yu stap toktok olsem Mummy blong mi!

Enid: Itru! Yufala ol boe! Yu stap lez tumas!

Tom: Mi no wandem wokem garen ful laef blong mi Enid.. mi wandem gat wan wok, mo winnim smol mane! Mi wandem kam wan tija.

Enid: Tru?

Tom: Mi aplae blong go long tija training kollege finis..

Enid: Bae yu go Tom?

Tom: Olsem wanem? Yu no glad?

Enid: Si! Mi glad.

Tom: Yu glad sapos we mi mi go mi nomo kam bak?

Enid: Be yu mas go?

Tom: Mi no save...

Enid: Yu no save tij long skul ya? Oli stap lukoatem ol man blong tij oltaem nomo.

Tom: Yu wandem se mi stap Enid? [**Hemi tekem han blong hem mo lukluk long eye blong hem.**]

Mary: Enid! Enid! Yu stap wea? Enid! [**Hemi stap singoat behaen long bakdrop.**]

Enid: Tom! [**Hemi pullum aot han blong hem.**] Bae mi luk yu tomoro! [**Hemi ron igo aot har hairrap.**]

[**Jif hemi kam wetem wan man blong servem kava.**]

John: Kava iredi jif!

Jif: Ale John...

John: [**Hemi servem kava.**] Yu harem storian blong smol gel ya jif?

Jif: Smol gel?

John: Hemi no gat 12 yia iet, be hemi gat bel! Ol gel tede oli stap mekem ol rabis samting stat long taem we oli smol nomo istap!

Jif: Fasin blong ol yungfala tede.. I mekem skin blong mi kol kol we!

John: Taem we yumi bin yungfala, yumi neva bin mekem kaen fasin olsem!

Jif: No gat! [**Hemi dring kava blong hem. Isaac hemi wokbaot ikam.**]

Isaac: Aftanun Jif! John..

John: Aftanun Isaac!

Isaac: Laki ol boe oli no kam flattem kava blong yumi!

Jif: Oli stap dring longwe....Oli mas dring kava evri naet!

John: Ino gud ah?

Jif: Taem we mi mi bin yungfala olsem.. mi no bin dring evri naet!

Isaac: Oli stap lernem ol rabis fasin long taon ya... [**John ino stap servem kava blong hem. Isaac hemi luk mo hemi kross.**] John! Traem harriap littlebit!

John: Ya!

Isaac: Mi klad long sel ya... [**Hemi tekem sel ya mo hemi dring. Hemi puttum sel igo doan.**] Jif... mi wandem stori wetem yu...

Jif: Stori long wanem?

Isaac: Long wota suplae blong yumi..

John: Inomo wok bakegen!

Jif: Ahh.. yes..

Isaac: Ol woman oli stap toktok plante.. oli wandem se yumi fiximup.

Jif: Hmmm...

Isaac: Olsem wanem jif? Bae yumi gat miting?

Jif: Mi save singoatem wan miting, sapos yu wandem.. be yu save ol man long vilij ya.. oli stap lez tumas!

Isaac: Yumi evriwan yumi nidim wota...Bae yumi miting from Jif?

Jif: Okay! tumoro! long aftanun, taem we ol man oli kam bak long garen.

Isaac: Bae mi talem long woman blong mi! Bae hemi klad.. ale bae yumi dring bakegen! Tu mo sel John....

[**Oli freeze mo go aot.**]

[**Enid hemi wokbaot I kam insaed. Hemi go sidoan, mo hemi giamen blong ras rasem ol kakae. Mary hemi kam insaed hariap, mo hemi sek long hem.**]

Mary: Enid!

Enid: Olsem wanem Mummy?

Mary: Yu go wea? Mi stap lukaotem yu olbaot!

Enid: Bel blong mi I stap tonton no gudwe Mummy! Mi go long smol haos..

Mary: Mi singoatem yu gogo! Yu no harem mi?

Enid: Mi harem yu yu singaot be ..

Mary: Be wanem?

Enid: Bel blong mi I stap tonton. Mi harem se mi wandem tro aot Mummy.

Mary: Yu sik?

Enid: Smol.. bae mi oraet.

Mary: Yu no mas kakae tumas fruits! Yu nao yu wandem kakae fruit fruit oltaem! Mi talem long yu finis se bae I spolem gut blong yu!

Enid: Yes Mummy.. [**Hemi stap laf long hem wan.**]

Mary: Ale, wasem ol kabig lif long wota ya.. mo sakem long saucepan. Yumi mas go from wota bakegen long morning ya.. ples i stap hot tumas, be yumi mas wokbaot long eye blong wota nomo nao!

Enid: Mummy yu tink se bae ol man oli fiximup wota suplae ya?

Mary: Oli mas mekem! Sapos we yumi mas go from wota oltaem nomo.. tumas wok ya!

Enid: I tru ..

Mary: Daddy hemi talem se bae hemi stori wetem jif long kava bar.. bae yumi luk sapos we jif I agri blong gat wan miting ono.... Ale bae yumi karem ol kakae longwe.. Daddy bae hemi wandem kakae taem we hemi kam bak long haos ... [**Oli go aot.**] [**Ol man oli kam insaed bakegen. I gat nois blong boo boo sel.**]

Chorus: Wanem ya? [**Sam akta oli ron I kam.**]

Boo boo sel ya! [**Sam mo akta iet oli ron I kam.**]

Jif hemi songaotem yumi ol man blong hem [**Ol las man oli kam insaed.**]

Blong kam sidoan long nakamal!

Miting!

Miting!

Miting blong wanem?

Wan gel hemi gat bel bakegen?

Ol boe oli mekem hambrew?

Man I kilim no gud woman blong hem?

Wanem nao I happen?

Bae yumi har hariap

Blong go finemaot!

[**Oli go sidaon harriap. Tom mo Enid oli luk luk tufala, mo Mary hemi lukim**

**Enid mo pussum hem igo daon kwiktaem. Jif hemi kam insaed. Tom mo**

**John oli stap long sem saed.**]

Jif: Aftanun olgeta!

Ol: Aftanun!

Jif: Bae yumi miting from wan impotent samting blong yumi long vilij ya, tede long aftanun! Isaac.. bae yu mekem opening pray ....

Isaac: [**Hemi stap stan up nao.**] Papa god, yu nao papa blong mifala evri wan long wol ya. Yu bin luvem mifala tumas, mekem se yu sakrifisem aon boe blong yu, blong mekem se mifala I save gat longfala mo eternal laef! Mi askem yu nao blong kiv han long mifala bakegen! Mekem se mifala evriwan we I stap long miting ya, I save luk save ol nid we yumi gat mo bae yumi evriwan long vilij ya I save wok tugeta, blong mekem se laef blong yumi long ples ya, I save kam mo gud! Long nem blong boe blong yu Jesus.. Amen.

Ol: Amen... [**Ol man oli sidoan bakegen.**]

Jif: Mi singoatem ol man blong kam long nakamal ya tede. Yumi gat wan bikfala problem long vilij ya! Wota inomo stap ron. Ol woman oli stap komplain from. Ale! Bae yumi mekem wanem nao?

Isaac: Bae yumi fiximup wota suplae bakegen jif! [**Ol woman oli agri.**]

Jif: Samting ya nao yumi wandem!

John: Jif!

Jif: John?

John: Yumi save fiximup suplae ya, be bae I brok daon bakegen ino longtaem!

Mary: [**Hemi stap toktok long Enid.**] Hemi stap toktok krangke nomo!

Jif: Yu talem olsem from?

John: Jif.. sam long mifala ino glad long wota suplae ya.

Mary: No glad? Hed blong yu iolsem wanem?

Jif: Mary! Yu stap kwiet! Ol woman oli no stap toktok long nakamal ya!

Isaac: Mary! Enaf!

Jif: John! Fromwanem nao yu stap talem toktok ya? Yu krangke?

John: No jif! Mi talem tru! Sam long mifala ino gat tap kolosup long haos blong mifala nating! Long luk luk blong mifala.. suplae ya hemi blong sam man nomo. Ino evriwan!

Isaac: Jif! Jif! [**Hemi sakem han antap.**] Jif! Bae mi toktok!

Jif: Isaac! Goahed!

Isaac: Jif! Sam man long vilij ya, oli wandem pleple politik nomo! Oli no kea long laef blong ol narafala man nating!

Jif: Slo doan Isaac!

John: Yu stap talem politik from?!

Isaac: Yufala we I stap long parti ya! Yu no wandem wok tugeta wetem mifala nating!

Jif: Isaac! Mi talem finis...

John: Yufala nao yu wandem daonem mifala nomo! Yufala nao yu stap gensam mifala oltaem, from we.....!

Isaac: Giamen! Yu no bin vot long kandidate we yumi evriwan I bin agri long hem!

John: Mifala ino bin agri long man ya tu! Hemi bin stap hao mas yia long parliaman be hemi neva bin mekem wan samting nating blong kiv han long yumi!

Tom: Yumi neva lukim wan gudfala samting nating long ples ya!

Isaac: Yu no daonem bikman blong yumi!

Tom: Yumi gat wanem long aelan ya? Ah? I gat wan dispensary.. be meressin? Meressin ino gat nating! Yu save go ded long dispensary nomo!

Jif: Yumi no kam long ples blong toktok long saed blong politik! Yumi kam from wota suplae! Mi wandem save tinktink blong yufala long saed blong suplae ya! Ale! John!

John: Yufala nomo yu gat ol tap kolosup long ol haos blong yufala.. be mifala.. Mifala I mas wokbaot from wota, no matta sapos we suplae I wok o ino wok!

Jif: John! John! Yu traem talem wan toktok we I gud littelbit! Yu no save sakem ol kaen toktok olsem long miting ya!

Isaac: Hemi no wandem wok tugeta wetem ol narafala man nating jif!

John: Yu talem wanem? [**Hemi gerrup nao olsem we hemi redi blong kilim man I ded.**]

Jif: Enaf! Enaf! [**John hemi sidaon sloslo.**] Sapos we yumi ino wandem gat wota suplae I gud! Leko nomo! Yumi save stap olsem nao! Sapos we man i no gat buket, hemi save karem ol bamboo mo wokbaot from wota. Olsem we yumi bin mekem long taem blong dakness!

Isaac: Sam long yumi oli stap long dakness iet!

John: Yu stap tokbaot hu? Talem! [**Hemi gerrup redi blong faet, be Tom I pullum hem I go daon.**]

Mary: Eeee! Nakamal ya! Ol man oli no gat respek nating!

Jif: Bae yumi klosem miting ya nao ya! Isaac! Mekem wan pray blong klosem miting ya!

Isaac: Stan up! Fasem eye blong yufala! Tank yu papa god blong..... [**Hemi no save gud hao blong go ahed nao.**] Papa god tank yu blong kivim janis blong mifala long vilij ya blong stap tugeta! Blong luk save ol tinktink we I stap! Long nem blong boe blong yu Jesus! Amen!

Ol: Amen!

**Chorus blong ol man nomo. Ol woman ol stap lukim ol man be oli no toktok. Oli stap harem no gud from wota suplae ya.**

Forgettem wota suplae ya!

Mi lez long hem finis!

Yumi no wandem kiv han long ol rabis man longwe tu! [**Wan grup hemi pointem narafala grup.**]

Oli stap long difren pati!

Oli go long difren jioj!

I gud sapos we oli trubol from wota! [**Tufala saed I toktok long olgeta nomo wetem audience.**]

Bae oli safa!

Bae oli harem no gud

Bae ol pikinini blong olgeta I sik sik!

Oli wandem toktok no gud long yumi!

Oli wandem daonem yumi!

Bae oli luk wanem bae I happen

Bae oli luk!

[**Ol man oli wokbaot iko nao. Mary mo Enid oli stap.**]

Mary: Ol man oli wandem rao rao nomo. Be yumi ol woman bae yumi trubol bikwan from wota! Ino olgeta tu! [**Enid mo Mary oli go aot nao.**]

[**Enid hemi kam insaed wetem buket bakegen. Hemi stap wokbaot igo olsem we hemi lez litelbit. Tom istap hait mo taem we hemi singoat hemi mekem Enid I sek.**]

Tom: Enid!

Enid: Tom... ! Kas! Hat blong mi I pump we! Yu no mekem mi mi sek long fasin olsem! [**Hemi go blong slappem hem, be Tom I kasem han blong hem.**]

Tom: Kam...

Enid: Mi stap har hariap! Oli nidim wota long haos! [**Enid hemi no lettem Tom I pullum hem igo.**]

Tom: Mi gat wan samting blong talem long yu! Ale! [**Hemi pullum Enid blong sidaon long fored blong akting aria.**]

Enid: Wanem?

Tom: Skul komittee I talem se mi nao mi save tij long skul ya!

Enid: Tom?!

Tom: Bae mi winnim mane! Smol.. Olsem wanem? Yu no glad?

Enid: No.. no.. mi klad be...

Tom: Yumi save stap tugeta nao Enid. Bae mi no save ronwei long yu.

Enid: Tom...

Tom: Hey? Wanem ya? Yu no wandem se yumitu yumi stap tugeta? Yu wandem wan difren man?

Enid: No! Be.. fromwanem nao I bin gat faet long miting ya? Long saed blong wota suplae? Fromwanem nao Daddy blong yu I stap kross kross wetem Daddy blong mi?

Tom: Oli stap kross from politik Enid! Daddy blong yu hemi stap long sem pati wetem jif. Oli stap kontrolem evri samting! I had blong mifala blong wok wetem olgeta..

Enid: Be fromwanem nao yumi no save fiximup suplae ya Tom? Problem blong wota ya I stap spolem yumi evriwan!

Tom: Yes be.. oli stap supotem rabis man ya! MP blong yumi! Hemi no stap kiv han long yumi ol man ples nating! Hemi stap kivim mane long ol supota blong hem nomo!

Enid: Be yumi evriwan I nidim wota Tom!

Tom: Leko Enid! Yu no save wan samting nating long saed blong politik! [**Hemi kross nao.**]

Enid: Okay...

Tom: Bae yu kam woman blong mi Enid? [**Hemi talem olsem we hemi kross.**]

Enid: Tom... yu no save askem samting ya taem we yu yu kross olsem!

Tom: Sapos we yu no glad long mi, bae mi no go tij long skul ya. Bae mi go long taon nomo nao.

Enid: No Tom.. bae yu stap. [**Vois blong hemi slo nomo.**]

Tom: Bae mi go stori wetem Daddy blong mi Enid... taem we hemi slo daon littelbit. [**Hemi tekem han blong hem, mo oli wokbaot igo aot tugeta.**]

**Chorus o song- ol man oli divide long 2 group mo oli sarem ol line olsem:-**

***Politik!***

***Mi nao mi supota blong bikman blong yumi***

***We hemi stap sidaon long bikfala nazara longwe!***

***Mi mi no likem man ya nating!***

***Hemi no save wan samting!***

***Hemi skul kasem klass six nomo!***

***Wanemi rong!?***

***Hemi bigman blong yumi!***

***Hemi stap kivim kakae mo kava!***

***Long yufala nomo!***

***Yumi stap long pati ya nao!***

Evriwan: Yumi supotem man blong yumi!

No matta se meresin ino gat nating long klinik

No matta se rod ino gud istap  
 O skul haos hemi rotten  
 Mo buk ino gat  
 Be yumi ol man  
 Yumi strong long politik iet ya!

**[Ol akta oli freeze, be Tom hemi wokbaot long fored mo taem we hemi singoatem ol pikinini, ol narafala akta oli ron ikam olsem ol pikinini nao.]**

Tom: Ale Klass! Kam insaed!

Ol: Morning tija!

Tom: Evriwan istap tede?

Ol: Umm... **[Oli stap luk luk raon.]**

Pik 1: Weam Jenny?

Pik 2: Daddy blong hem I talem se hemi mas lukoatem ol pikinini long haos! Bae hemi no kam tija!

Tom: Ol bikfala exam oli stap kam kolosup nao! Yu mas talem long Mummy mo Daddy blong yufala, se yufala evriwan i mas kam skul evride, sapos no bae yufala ino save passem ol exam! Yu harem?

Ol: Yes Tija!

Pik 3: Tija...

Tom: Olsem wanem?

Pik 3: Daddy blong mi hemi talem se ...ol pikinini long skul ya oli neva pass long bikfala skul...

Tom: Yumi mas wok strong iet! Yumi mas traem bes blong yumi, mo wan de, bae I happen! Bae yu luk! **[Ol pikinini oli laf nao.]** Ale! Bae yumi mekem wok! Bae yumi mekem sam maths! Mi gat sam buk istap... **[Hemi karem aot tu buk we oli olfala mo oli no gud nating. Hemi passem long tu long ol pikinini. Ol narawan oli puttum aot ol han blong olgeta from oli wandme holem buk tu.]** Ino gat enaf buk blong yumi evriwan! Yumi mas sarem ol buk we I stap! Okay?

Ol: **[Oli stap harem no gud.]** Yes tija!

Tom: Ale, bae yumi go long multiplication.. long page 37 blong buk ya.

Pik 3: Be wanem ya, *Multiplik* samting?

Tom: Hemi multiplication ino multiplik! Mo hemi .. ummm.. hemi ..

Pik 4: Hemi taem yu addemup ol samting tugeta!

Tom: No! Ino olsem.. umm.. hemi olsem we ..

Pik 2: Papa god I talem se 'go forth mo multipli!'

Tom: Yes! Iminim se yumi kam plante mo!

Pik 1: I talem divide tu long ples ya long buk tija.. divide hemi wanem?

Tom: Kas... okay! Tinkbaot graon we I stap!

Ol pik: Yes!

Tom: **[Hemi pointem wan pikinini.]** Daddy blong yu hemi gat bikfala graon?

Pik 2: Daddy blong mi hemi gat bikfala graon!

Tom: Mo yufala ol boe, yufala hao mas?

Pik 2: Six evriwan!

Tom: Wanemi bae I happen taem we yufala ol boe yu kam bikwan? **[Pik 2 hemi konfus nao.]**

Pik 3: Mi save tija! Mi save! Oli mas dividem graon igo long six pis!

Tom: Hemia nao!

Pik 4: Graon istap kam smol nao Tija!

Tom: Mo pikinini bae hemi gat pikinini iet. Wanem bae I happen taem we yufala nao yu gat ol pikinini? Bae graon hemi enaf blong evriwan we I stap?  
**[Ol pikinini oli stap lukim olgeta olsem we oli fraet.]**

Pik 2: Tija?

Tom: Yes?

Pik 2: Yu yu gat bigfala graon?

Tom: Mi gat five brata, mo evriwan oli gat ol boe.

Ol: Sori...

Pik 4: Be yu stap tij long skul ya! Yu no nid blong wokem graon tu tija!

Ol: Mifala I likem yu! Yu wan gudfala tija!

Tom: Mi no gat ol gudfala qualifications, be mi mi likem wok ya! **[Hemi stap toktok long audience nao.]** Mi stap tri had wetem ol pikinini! Be wan samting nomo I stap spolem mi...

**[Ol pikinini oli ron igo aot nao. Tom hemi stan up hem wan mo jif hemi wokbaot ikam insaed.]**

Tom: Jif!

Jif: Olsem wanem boe?

Tom: Mi wandem askem nomo, sapos we skul komitee I karem mane blong mi ono?

Jif: Mane blong yu?

Tom: Mi wok long skul ya gogo.. be mi no kasem wan mane nating iet.

Jif: Yu wet smol.. mane bae I kam.

Tom: Ino wan bikfala mane jif! Wan smol mane nomo! Bae I kam wotaem?

Jif: Yu save boe.. yumi long aelan yumi no gat mane... mekem se I had long ol parents. Hao nao oli save finem mane blong payem skul fee blong ol pikinini blong olgeta? Sam oli gat fulup pikinini littelbit!

Tom: Mi nao mi mas wok blong nating?

Jif: Mi no talem olsem Tom.. mi askem yu blong wet smol.. hemia nomo.

Tom: Luk jif.. mi mi wandem marret ino longtaem.

Jif: Tru?

Tom: Mi no save wokem garen blong mi from mi stap wok long skul ya! Hao nao bae mi lukoatem gud wan woman.. mo payem bride pris? Talem!

Jif: Bae mi traem toktok wetem ol parents Tom. Yu wet smol ah?

Tom: Smol nomo jif.. smol nomo. **[Jif I go aot behaen long bakdrop mo Tom hemi stap wokbaot I kam be John hemi ron ikam tru long audience, wetem wan nuispepa.]**

John: Tom! Luk! Kovman bae I jensem savat bakegen!

Tom: Gud ya! Ol man ya oli no mekem wan samting nating! Silip long ol chair blong ol long bikfala haos blong parliaman nomo!

John: I stap talem long pepa se bae I gat elekson! **[Hemi soemaot pepa ya long Tom. Mo Tom hemi ridim.]** Bae yumi gat janis blong aotem ol rabis man we oli stap hao mas yia finis! Oli no stap no mekem wan samting nating! Yumi no bin gat radio blong ol manis ya, be oli no mekem wan samting! Yumi mas puttum wan kudfala kandidate blong yumi! Wan we hemi stap tinkbaot aelan ya!

Tom: Afta bae hemi mekem wan gudfala samting wetem allocation blog hem! Ino sakem long ol sapota nomo!

John: Hemia nao!

Tom: Be hu nao kandidate blong yumi Papa?

John: Bae ol man long pati blong yumi oli miting from! Bae mi go lukim ol fren blong yumi, blong tokbaot! [**Hemi stap go aot nao.**]

Tom: Ale.... [**Hemi stap kwiet mo Enid I kam insaed.**]

Enid: Tom!

Tom: Ahh.. Enid?

Enid: Tom.. yu oraet?

Tom: Mi harem gud taem we mi luk yu..

Enid: Yu talem tru?

Tom: Be yes! Yu no luk save iet?

Enid: Mi save se plante boe oli stap talem kaen toktok olsem be...

Tom: Be wanem?

Enid: Tame we gel I talem se hemi gat bel .. oli ronwei!

Tom: Yu tink se mi mi olsem ya nao? Mi no faithful nating?

Enid: Bae yumi jus luk.

Tom: Wanem?

Enid: Tom.. mi fraet se mi gat bel.. mi no luk sik mun blong mi nating long manis ya..

Tom: Ohhh..

Enid: Yu no klad ah? Yu stap pleple nomo.. ol toktok we yu bin sakem long mi ino tru nating.

Tom: I tru nomo, Enid. Mi likem yu..

Enid: Afta? Yu no wandem marretem mi?

Tom: Si! Be mi stap fraet long Daddy blong yu.. hemi wan had man littelbit. Be mi wandem stap wetem yu Enid. Bae mi no ronwei.

Enid: Yu wandem stap wetem mi Tom? Yu talem tru?

Tom: Mi talem gogo mi lez blong talem bakegen nao!

Enid: Yu ya! Bae yu talem oat long famili blong yu? Bae oli kam stori long Daddy blong mi?

Tom: Okay..

Enid: Mi fraet se bae ol man oli luk save ino longtaem. Bae yu no wet longtaem tumas Tom! [**Hemi go aot nao**]

Tom: Hao nao bae mi talem oat long Daddy blong mi se mi givim pikinini long hem?

Chorus: Hey! Bae i gat elekson! [**Wan man hemi singoat mo ol narafala man oli ron I kam insaed.**]

Kovman I faldaon!  
 Elekson bakagen!  
 Bae ol kandidate blong yumi  
 Oli mas roanem aelan!  
 Oli no stap kam long ples ya nating taem we oli holem chair  
 Be taem blong kampaign nomo  
 Bae yumi lukim fes blong olgeta!  
 Helo ol bikman! [**Ol wev.**]  
 Givim bag ris!

Kakae!  
 Saucepan!  
 Mane tu!  
 Janis ya!

John: Tom! Yu mas folem kandidate blong yumi, I go roan long aelan ya!  
 Tom: Mi Daddy? Be olsem wanem long skul ya?  
 John: Oli no payem wan mane nating long yu iet! Yu wandem stap long skul ya from?  
 Tom: Be ol student Daddy..  
 John: Oli no stap payem yu boe! Oli tritim yu long fasin ya, from we yu no stap long sem pati olsem jif ya!  
 Tom: Yu talem tru?  
 John: Jif I save foeseem ol man blong hem blong payem ol skul fee, be hemi no wandem save long yu boe!  
 Tom: Yes be...  
 John: Westem taem blong tijim ol pikinini blong olgeta! Ale yu folem kandidate blong yumi! Ko kampaign wetem hem. [**Tom ino toktok.**] Wanemi rong?  
 Tom: Mi.. mi ummm... mi gat wan samting blong askem long yu Daddy. Mi wandem marret.  
 John: Marret? Marretem hu?  
 Tom: Gel blong Isaac.  
 John: Wanem?  
 Tom: Daddy.. mi save se yutufala I stap kross wetem yutufala be...  
 John: Mi no wandem toktok wetem man ya nating! Hemi stap sapotem man ya we hemi stap spolem yumi ya!  
 Tom: Enid hemi gat bel Daddy..  
 John: Ino minim se yu mas marretem hem tu!  
 Tom: Be...  
 John: Yu go folem kandidate blong yumi! Sapos we hemi go insaed, bae hemi save kiv han long yumi bikwan Tom! Bae yu wari from gel ya afta..Bae yumi winnim olgeta! Malele ho! [**Hmei singoat strong mo oli wokbaot igo aot wetem Tom ya.** ]

[**Enid hemi kam insaed wetem Mary. Mary hemi stap finem I had blong wokbaot.**]

Mary: Lek blong mi I so we I so Enid... Mi no silip gud nating las naet. Hemi so tumas.. [**Enid I tujim lek blong hem.**]  
 Enid: Yu yu hot Mummy...  
 Mary: Mi mi lez blong wokbaot longwe olsem Enid..  
 Enid: Sapos we ol bikman we oli stap ron olbaot long ol bikfala kamiong I save kiv han long yumi....  
 Mary: Mi no save wokbaot Enid! Bae mi ko bak long haos mo spel littlebit.  
 Enid: No Mummy! Yu tinkbaot man ya we hemi no bin go from tritman from wan rabis so long lek blong hem? Oli mas katem aot lek ya! Ale! Yumi go, Mummy!  
 Mary: [**Hemi wokbaot smol afta hemi finem I had blong wokbaot.**] Aiwe ..!  
 Enid: Yu sidoan. Mi bae mi go luk nurse.. Bae mi kam bak hariup! [**Enid hemi ron iko aot. Mary hemi sidoan long acting aria mo hemi holem lek blong hem.**]

- Mary: I so tumas... [**Hemi stap movem hem olsme we lek I so we I so.**]  
 [**Jif hemi kam insaed. Hemi stap stori wetem Isaac.**]
- Jif: Bae oli no save win Isaac! Mi bin talem candidate blong yumi finis, se bae evriman blong mi I mas vot long hem! Hemi no save lus! Ahhh.. [**Hemi lukim Mary hemi sidoan long rod.**] Mary? Yu oraet?
- Mary: Lek blong mi I so...
- Isaac: Mo gud yu go bak long hoas Mary!
- Mary: I so tumas Isaac.. yu no save go from wan kamiong.. blong karem mi I go bak long haos?
- Isaac: Ol kandidate oli stap yusum ol truk nao Mary.
- Mary: [**Enid hemi kam bak insaed.**] Enid olsem wanem?
- Enid: Mi luk nurse, be hemi no gat meresin nating long klinik...
- Mary: No gat meresin?!
- Isaac: Bae yu kiv han long Mummy, Enid! Karem hem igo bak long haos [**Enid hemi go helpem Mummy blogn hem blogn stan up nao.**]
- Mary: Yu no save giv han long mi Isaac?
- Isaac: Mifala I kam blong karem ol samting blogn flasem ples!
- Jif: Kandidate blong yumi bae hemi kam stori wetem ol man tede long aftanun Mary.
- Enid: Ale Mummy.. bae yumi go.
- Mary: [**Hemi wokbaot smol afta hemi tonem hem blong toktok long Isaac.**] Taem candidate hemi kam bae yutufala yu save askem hem fromwanem nao ino gat meresin long klinik ya! [**Hem mo Enid oli go aot. Jif mo Isaac oli go oat narasaed.**]
- [**Tom mo John oli kam insaed.**]
- John: Bae yumi mek save hem Tom!
- Tom: Yes Papa!
- John: Bae yumi askem wanem nao hemi bin mekem ova long ol yia we hemi bin stap long bikfala nazara blong yumi!
- Tom: Bae yumi mekem ol naraman oli luk save! Oli westem taem nomo, blong vot long wan man olsem! Yumi wandem wan man we hemi save mekem laef blong yumi I kam mo gud?
- John: Nao ya!
- Tom: Ino tumoro o afta tumoro!
- John: Nao ya!  
 [**Enid hemi wokbaot I kam narasaed acting aria.**]
- Enid: Tom! [**Tom hemi luk hem. John hemi mekem sign long Tom blong folem hem. Hemi wokbaot igo aot.**]
- Tom: Aftanun Enid.. [**Hemi stap wokbaot pass long hem, be Enid I holem hem nao.**]
- Enid: Tom?! Fromwanem yu no sendem wan famili blong kam stori wetem Daddy blong mi? Yu bin promisem mi!
- Tom: Ino wan gudfala taem nating nao Enid..
- Enid: Yu wandem wet kasem wotaem?!
- Tom: Kasem taem kampaign ya I finis.
- Enid: Mi stap tro aot evri morning Tom.. sapos we Mummy iluk mi..! [**Hme luk se Tom hemi wandme go nao.**] Yu no kea ah? Ino yu we bae I safa! Mi nomo! Mi

- bin belivim yu Tom.. mi bin tink se taem we yu bin talem se yu likem mi, yu stap taelm tru! Be yu olsem ol narafala boe nomo! **[Hemi wokbaot igo hariap.]**
- Tom: Enid! Enid! **[Enid I go aot.]** Mi likem yu.. be...  
**[Isaac hemi wokbaot I kam insaed. Tom hemi stap luk hem.]**
- Tom: Umm.. Isaac..
- Isaac: Yu wandem wanem?
- Tom: Yu oraet Isaac?
- Isaac: Yes! Mi oraet? Yu wandem save from?
- Tom: Isaac mi save se yumi stap long difren pati.. mo yu no klad tumas long fasin blong mifala...
- Isaac: Afta?
- Tom: Yu... mi... um... mi no sud talemaot samting ya stret long yu, be mi mas save sapos we...
- Isaac: Sapos we wanem?
- Tom: Mi likem gel blong yu.
- Isaac: Yu krangke?!
- Tom: Mi likem hem! Sapos we yu agri bae mi marrettem hem. Mi no gat wan bikfala graon tumas.. be mi stap wok.
- Isaac: Mi harem fulup parents oli stap komplain from fasin blong yu Tom.
- Tom: Wanem?
- Isaac: Yu stap pleple politik! Yu nomo mekem wok blong yu long skul ya nating!
- Tom: Man! Oli no payem mi! Mi stap tij be mi no kasem wan mane nating! Mi lez nao!
- Isaac: Plante man oli talem se yu no fit blong mekem wok ya tu! Yumi mas gat ol train tiji nomo.
- Tom: I gud! Yu askem kandidate blong yu fromwanem nao yumi neva gat ol train tija long vilij ya! Askem fromwanem kovman oli no interest nating long education blong ol pikinini blong yumi! Askem hem!
- Isaac: Yu bae yu no kam kolosup long gel blong mi. Yu harem? Yu bae yu neva save kam man sapos we mi mi laef I stap!  
**[Tom hemi luk hem mo I klir se hemi wandme punchem hem afta hemi wokbaot I go aot harriap. Isaac hemi stap long acting aria. Hemi kross we hemi kross. Be taem we chorus oli singaot hemi klad bakegen. Ol man oli mekem akson be bikman ino gat. Oli sidaon long acting aria mo oli fesem audience.. yu save yusum sem staging olsem governance ple.]**
- Chorus: Bikman I kam!  
Karem floa!  
Puttum long nek blong hem!  
Hemi bikman blong yumi  
Hemi stap long bikfala nazara!  
Bae yumi sidoan  
Mo lisen long toktok blong hem.  
Hemi toktok gogo!  
Mi harem mi wandem silip nao...  
Be hemi promisem fulup samting!  
Fulup kudfala samting sapos we yumi vot long hem!
- Tom: Mi gat wan kweston!

Jif: Kweston? Yu wandem askem wanem long bikman blong yumi?

Tom: Bikman! Yu stap longtaem we longtaem long kovman.. fromwanem nao ino gat jenis nating long vilij ya?

**[Chorus oli gerrup nao mo oli toktok kross long Tom.]**

Chorus: Yu no toktok olsem!  
Yu no gat respek nating!  
Hemi bikman blong yumi!

Tom: Olsem wanem long ol toktok we I stap go roan, long saed blong laef long yu long taon? I tru se yu stap drong oltaem, mo yu stap folem ol woman?

Yumi no tokbaot samting ya!

Hemi bikman blong yumi!

Shuttem maot blong yu nao ya!

**[Tom hemi go aot wetem John. Jif, Isaac, Enid mo Mary oli stap long acting aria. Enid mo Mary oli go ahed olsem we oli stap mekem wan bikfala kakae I redi. Enid hemi stap lisen long Daddy blong hem taem we hemi stap wok.]**

Jif: Mi sem we mi sem Isaac! Oli spolem bikman ya.. long fored blong yumi evriwan long vilij!

Isaac: Boe ya hemi kam bikhed tumas, from yu kivim wok long hem long skul ya!

Enid: Oli talem se hemi wan gudfala tija Daddy.

Isaac: Gudfala tija? Hemi no qualify!

Enid: Oli talem se bikman blong yumi hemi no bin kasem klass six.... hemi neva flattem primary skul blong hem.

Isaac: Samting ya I difren olgeta Enid! Yu no save?!

Jif: Taem we bikman blong yumi hemi bin skul, skul hemi bin minim wan samting! Mifala ibin gat ol tija we oli save samting! No matta se mifala I skul kasem klass six nomo mifala I gat edukation! Ino olsem nao ya! Ol yungfala ol skul gogo.. be oli save wanem?

Isaac: Hao blong givim pikinini long ol gel bifo we oli marret! Oli save samting ya nomo jif!

Jif: From samting ya nao mi stap blokem ol nurse blong no kivim aot kondom long ol yungfala! Oli wandem spolem ol gel roan long ples ya! Lukaot se ino happen long gel blong yu Isaac. **[Enid hemi sek, mo hemi go bak mekem wok blong hem.]**

Isaac: Bae mi watchem gud hem jif!

Jif: Mi mas go bak long haos smoltaem.. bae mi go kam bak Isaac.

Isaac: Ale Jif! **[Jif I go aot, afta Isaac hemi lukim Enid.]** Enid! Yu kam ya!

Mary: Olsem wanem Isaac?

Isaac: Enid yu kam ya nao ya!

Enid: Wanemi rong Daddy?

Isaac: Yu stap daonem bikman blong yumi! Yu tink se yu mo high bitim hem?

Enid: No Daddy.. be yu bin talem se Tom ino kwalify.. ino minim se hemi no gud from hemi no gat pepa. Hemi wan gudfala tija! Ol pikinini oli stap talem..

Isaac: Yu yu likem hem ah?

Enid: Daddy?!

Isaac: Talem long mi.. yu likem hem ono?

Mary: Enid?!

Enid: Mi.. mi mi stap likem hem Daddy.. Hemi bin talem long mi se bae hemi toktok long yu..

Isaac: Yu tink se yu save marretem man ya? Yu tink se mi bae mi lettem? [**Hemi holem hem mo hemi sek sekem hem.**]

Enid: Daddy!

Isaac: Yu no save marretem man ya!

Enid: Mi gat bel finis!

Isaac: Bae mi .... [**Hemi go from gel blong hem, be Mary hemi traem stoppem hem. Sem taem Tom hemi kam insaed.**]

Mary: Daddy!

Tom: Yu no tujim hem Isaac!

Isaac: Yu! Yu kivim pikinini long gel blong mi?!

Tom: Mi wandem stretem ol samting! Bae mi klinim fes blong mi long fored blong yufala ol famili festaem, afta bae mi marretem hem.

John: [**Hemi wokbaot ikam.**] Yu no save komplain Isaac! Boe hemi mekem ol samting I stret nao!

Mary: Isaac.... tinkbaot. Mi save se yu yu kross, be sapos we Enid I gat bel.. hemi mas marret nomo nao. Ino gat narafala samting blong mekem.

Enid: Daddy plis!

John: Oli talem tru Isaac.

Isaac: Mi no klad long fasin ya we boe blong yu i bin mekem John!

John: Kas! Tufala bae oli marret, afta evri samting I oraet!

Mary: I tru Isaac! Traem tinkbaot Enid ya! Gel blong yumitu! Bae hemi harem olsem wanem, sapos we hemi no save stap wetem boe ya? Hemi likem hem we.

Enid: Daddy! [**Hemi faldoan long knee blong hem long fored blong Isaac. Isaac hemi kross no gud iet, be hemi wokbaot smol. Afta hemi stop mo hemi toktok, be I klir se hemi stap forse hem wan.**]

Isaac: John! Yu wandem se Tom ya I marretem Enid?

John: Ino mi we I wandem samting ya. Tom nao hemi kam askem mi.. mi bin talem long hem se bae yu ... yu mas toktok no gud long hem. Be hemi wandem gel ya iet.

Isaac: Yu wandem Enid, Tom?

Tom: Mi wandem marretem hem Isaac. Bae mi lukoatem gud hem. Bae mi mekem evri samting we hemi wandem. Mi wandem se hemi stap klad se hemi bin jusum mi.

Enid; Ohh Tom...

Isaac: Mi sori long gel blong mi.. from samting ya nomo bae mi lettem yu yu kam man blong hem. [**Enid mo Tom oli holem tufala nao.**]

Mary: Mi glad we mi glad! Enid! Kam kissim mi nao ya! [**Enid I kam kissim hem.**]

Isaac: Tom, yu bin spolem gel blong mi finis.. be ating ol bikman blong yu oli bin tijim no gud yu..

John: Wanem? Yu minim wanem stret Isaac?

Enid: Daddy?!

Isaac: Mi minim se ol bikman, long pati blong yu, oli stap aftarem ol yangfala gel oltaem nomo mekem se...

John: Yu .. yu..!

Tom: Daddy...

John: Pati blong yu I fulup wetem ol rabis man we oli stap folem ol woman blong rod...! Yu no save talem ol bikman blong mifala! Yu luk long ol doti man we I stap long pati blong yufala festaem!

Isaac: Evriwan I save wanem we ol bikman long pati blong yufala I stap mekem!

John: Ol man long pati blong yu, oli no gud stret! Oli stap stihlim mane blong ol man .. oli neva bin mekem wan gudfala samting nating! Oli neva bin skul...! Oli olsem yu nomo! Oli no gat hed nating!

Isaac: Bae mi... ! Gel blong mi bae hemi no save marretem boe blong yu!

John: Boe blong mi ino save marretem gel blong yu! Neva! Ale Tom! Kam!

Enid: Tom!

Isaac: Yu no go kolosup long hem Enid! **[Isaac hemi go from wan akis.]**

Tom: Isaac! Tinktink bakegen... Daddy ino minim se...

John: Mi mi minim evri toktok we mi mi talem! Tru god antap!

Isaac: Bae yu tufala yu go bifo we mi katem yu wetem akis ya!

Enid: Tom! Mi luvem yu! Tom!

Tom: Enid...

John: Y kam nao ya Tom! Yu no save marret long gel blong krangke ya!  
**[Isaac I ronnem tufala nao mi Enid hemi faldoan long knee blong hem mo hemi stap kri.]**<sup>β</sup>

Mary: Ol samting I go no gud long vilij ya from I gat tumas politik! I gat tumas politik nomo!

**[John hemi pullum Tom igo aot mo Isaac hemi pullum aot Enid, mo Mary tu hemi go aot.]**

Song

Fromwanem nao ol samting igo no gud?  
Fromwanem nao yumi stap safa?  
Fromwanem man  
Ino save kiv han long man?  
Mo ol yungfala oli nomo wandem stap long vilij ya?

Toktok: From politik nomo!  
Politik

Mi luk luk raon long vilij ya  
Wota supli  
I brok inomo ron.  
Tija ino gat long skul  
From skul komittee ino wok!  
Skul haos tu  
Hemi rotten I stap  
I bin stap olsem longtaem tumas  
Be ol papa oli no wandem fiximup!

Chorus

Jif I sigaotem miting  
From ol problem we I stap  
Be from hemi stap long pati ya  
Few man nomo oli kam  
Ol narawan oli stap long haos  
Oli no wandem save.  
Mekem se  
Yumi save wet go go, be  
Ino gat wan samting bae I jenis!

Toktok: From politik nomo!  
Politik

Fromwanem nao ol samting igo no gud?  
Fromwanem nao yumi stap safa?  
Fromwanem man  
Ino save kiv han long man?  
Mo ol yungfala oli nomo wandem stap long vilij ya?